



17. august 2012

UKA 2012/181

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqummiuppara:

Kalaallit Nunaanni pinerluuteqarsimasut singernermikkut nalunaarsuuteqarlutik angerlarsimaffimmi pineqaatissinneqarsinnaalernissaat anguniarlugu, Naalakkersuisut Jusititsministerimut attaveqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Doris Jakobsen, Kristian Jeremiassen Siumut)

Tunngavilersuut:

Inatsisartuni Inatsiseqarnermut ataatsimiititaliami aammalu Folketingimi Inatsiseqarnermut ataatsimiititaliami sulinitsinni singernikkut nalunaarsuuteqartarneq nunani assigiinngitsuni misilittagaasoq misissuiffigivarput. Misilittakkat pitsaasumik tamarmik kinguneqartarsimapput. Ataatsimut inernilileneq tunngavigalugu, singernikkut nalunaarsuuteqarneq pinerluttartut utikaajaarnerannik annikillisisarpoq, nutaamik pinerloqqissinnaaneq annikillisittarlugu. Saniatigut, ilaqutaasut eqqorneqarnerat annikillisinneqartarpoq, meeqqat angajoqqaamik pinerlussimanerat tunngavigalugu ujariatsinnginnissaat anguneqartarluni.

Una siunnersuut siunertaqarpoq inuiaqatigiit akornanni pinerluttarnerup ataatsimut isigalugu annikillisinneqarnissaanik. Saniatigut pitsaasumik sunniuteqarsinnaavoq paarnaarussivinnut utaqqisut ikilisinneqarnerannik. Siunnersuutip atuutsinneqalerneratigut maannakkut pineqaatissinneqarsimalutik utaqqisut ilai neqeroorfigineqarsinnaanngussapput singernikkut nalunaarsuuteqalernissaannik paarnaarussivimmuut isertinneqarnissaannut taarsiullugu.

Pisortanut aningaasaqarnikkut allaffissornikkullu sunniutissat:

Singernikkut nalunaarsuusiilluni pineqaatissiisalerneq minnerulersissavaa nutaamik pinerluuteqaqqissinnaaneq. Tamannalu isumaqarpoq pinerluuteqartut ataavartumik ingerlaarnerat annikillisinneqassasoq.

Qanittoq isigalugu aningaasaqarnikkut iluaqutissai tassaapput, paarnaarussivinnik atuinerup annikillisinneqarnera, tamanna iluaqutaassaaq maannakkut inissisimaneq ilungersunartoq eqqarsaatigalugu Tamatuma saniatigut singernikkut nalunaarsuusiisarneq aningaasanik sipaarutaassaaq paarnaarussivinnut inissiisarnermut sanilliullugu.

Ungasinnerusoq isigalugu, inuiaqatigiit aningaasaqarnikkut iluaqutigissavaat pinerluuteqartartut ikinnerulerpata, pineqartoq inuiaqatigiinnut iluaqutaanerulissaaq pineqaatissinneqartullu ilaqtai aamma iluaquserneqassallutik.

Taamaammatt Naalakkersuisut kaammattorpagut qallunaat naalagaaffiat attaveqarfigeqqullugu, singernikkut nalunaarsuusiisalernissaq eqqunneqaqqullugu nunatsinnut iluaqutaassammatt.